

# Ina crusch sco regal pil giubileum

Il Hotel Kruezli a Sedrun sa festivar uonn il giubileum da 100 onns

DA HANS HUONDER / ANR

■ **En connex cun siu giubileum da 100 onns ha il Hotel Kruezli a Sedrun iniziàu ina acziun tut speciala. Sil Pass la Crusch – danunder ch’el num dil hotel deriva – ei vegniu montau ina crusch. Il menaschi da hotellaria che sa giubilar uonn vegn menaus dalla quarta generaziun.** Il Pass la Crusch sesanfla entadem la Val Strem ed ei la colligiaziun dalla Val Tujetsch cun il cantun Uri, respectivamein la regiun da Silenen, Gurtellen, Amsteg e Wassen. Il historiograf local *Tarcisi Hendry* relata dalla funcziun d’antruras da quei pass: «Pli baul surveva quei pass per exempel a peleginadis dalla Svizra centrala tier la claustra a Mustér ni il cuntrari dalla Surselva a Nossadunnaun. Da documents historics savein nus denton era ch’el pass vegneva nezegiaus era per il commerci cun animals, oravontut manedels. Il pass ha probablamein denton mai giugau ina impurtonta rolla, silmeins buc ina tala sco auters pass ella regiun dil Gottard. El ha silpli surviu sco impurtont passadi pils Tuatschins ed ils Uranes gest da l’auter maun dil pass, ella Val digl Etzli e Val Maderana.»

## Hrizli, Rizli, Krüzli

Il Pass la Crusch sesanfla sin in’altezia da 2350 meters sur mar. Dils Tuatschins vegneva el era numnaus pli baul Ritzli. «Gia el temps miez steva ina crusch sil pass, quei che argumentescha era siu num. Pader Placi a Spescha scriva Hrizli. La carta geografica, l’emprema dalla Surselva da 1857, porta il num Kreuzlipass. Oz ei en diever il num Chrüzlipass sillas cartas ufficialas, denton fetg currenta ei era la scripziun Krüzlipass. Il num romontsch Pass la Crusch ei grev d’eruir dapi cu ch’el ei en diever; ils Tuatschins han pil pli duvrau il num tudestg e las

scartiras dil 19avel tschentaner nodan pil pass il num Rizli», scriva Tarcisi Hendry en ina lavur davart il pass. Il Pass la Crusch fuorma era la colligiaziun dalla Via da s. Giachen dil Grischun e la Svizra centrala. Ils davos onns ha la crusch muncau sil pass che porta siu num. «Cruschs e capluttas eran pli baul ina part essenziala dils hospesiz. Cheu tschercavan ils pelegrins e viandonts la protecziun e benedicziun da Diu. In viadi els cuolms era adina cumbinaus cun prighels», di Tarcisi Hendry.

## Ina nova crusch

Sin iniziativa da Tarcisi Hendry dil Forum cultural Tujetsch e dil possessur dil Hotel Kruezli a Sedrun, *Curdin Brugger*, ei ina grappa da rodund diesch persunas serendida miez october sin via per montar ina nova crusch sil Pass la Crusch. Quella crusch ord metal ei vegnida construïda dil fravi *Luregn Derungs* da Surcasti, in aug dil hotelier tuatschin e dapi cuort temps era president da Sedrun Mustér Turissem. Leusi ei la grappa s’entupada culs

responsabels dalla camona digl Etzli, *Doris e René Bättig-von Känel* che han – suenter la lavur – offeriu in refrestg. La nova crusch ei vegnida montada sil cunfin dils cantuns Grischun ed Uri. Il liug da paus, ruaus e reflexiun ei vegnius cumpletaus cun ina conchiglia da s. Giachen ch’ei vegnida integrada leu en in crap. «Per nus ei quei stau in mument tut special. Sin quei pass s’auada semplamein ina crusch», di Curdin Brugger che ha sponsurau ella en connex cul giubileum da 100 onns da siu

menaschi da hotellaria el center dil vitg da Sedrun.

## Menaschi cun tradiziun

La construcziun dil Hotel Kruezli a Sedrun va anavos el temps cura che la lingua da viafier denter Brig e Mustér ei vegnida construïda. Sin quei tschancun futur dalla Viafier Matterhorn Gottard eran rodund 3000 luvrers occupai da gliez temps. «Quella truscha ha Florentin Cavegn nezegiau per ereger il menaschi cun uustria e casa d’albiert a Sedrun sper il menaschi ch’el possedeava gia sil Pass dall’Alpsu», constatescha *Leci Brugger* en sia revista davart la hotellaria en Val Tujetsch e davart il Hotel Kruezli. En Tujetsch era la famiglia Cavegn gia enconuschenta sil sectur dalla hotellaria e gastronomia, il Hotel Kruezli ei staus ina cumpletaziun e cuntinuaziun da quella historia. Il Hotel Kruezli ei buca mo daventaus in liug da sentupada dils luvrers, mobein era in’ustria dil vitg. Dapi sia construcziun avon 100 onns ei il menaschi restaus en famiglia. Suenter Florentin Cavegn ei la famiglia Johanna (nata Cavegn) e Leci Brugger stada en possess dil hotel. 1966 ha lur fegl Leci affittau il menaschi e cumprau quel 1969. 1970 ei il hotel vegl vegnius spazzaus e remplazzaus dil baghetg che sesanfla leu aunc oz. Entochen 2003 han Leci Brugger e sia consorta *Imelda*, nata Derungs, menau il hotel en in temps ch’el turissem d’unviern ha fluriu e che las lavurs digl AlpTransit han entschiet. En quei temps ha il menaschi saviu vegnir engrondius e renovaus. Avon 11 onns ha il fegl *Curdin Brugger* affittau il hotel e dapi 2009 eis el possessur da quel. 2011 ei il menaschi vegnius renovaus per in’ulteriura ga. Oz occupa il hotel rodund nov persunas, porscha in’ustria, sala e 25 letgs da hospes.



La crusch da metal montada sil Pass la Crusch al cunfin dils cantuns Grischun ed Uri. MAD